

Prinsip wala' dalam UMNO penting untuk kemenangan BN pada PRU14
Astro Awani
Dec 1, 2016

KUALA LUMPUR: Prinsip wala' atau ketaatan dan kesetiaan kepada pemimpin dan institusi kepemimpinan UMNO telah dinilai sebagai perkara penting untuk mencapai kemenangan Barisan Nasional (BN) pada Pilihan Raya Umum Ke-14 (PRU14) yang bakal berlangsung tidak lama lagi.

Seruan mengenai kepentingan prinsip ini oleh Perdana Menteri dan Presiden UMNO Datuk Seri Najib Tun Razak untuk kali keduanya dalam Ucapan Dasar Presiden pada Perhimpunan Agung UMNO pada hari ini, selepas menyatakan perkara sama pada tahun lepas, mulai meninggalkan kesan kepada para anggota UMNO.

Lebih-lebih lagi apabila negara berada di ambang pilihan raya umum apabila rakyat perlu membuat pilihan antara kerajaan BN yang diindukkan UMNO sebagai pembela nasib orang Melayu dan Islam serta semua kaum lain dengan kerajaan yang diindukkan DAP yang memperjuangkan liberalisme melampau dan fahaman sekular.

Ucapan Dasar yang membakar semangat 2,643 perwakilan dari 191 bahagian UMNO itu menjadikan mereka lebih berpadu untuk menghadapi parti lawan dan mempertahankan parti orang Melayu itu.

Anggota Majlis Tertinggi UMNO yang juga Pengerusi Biro Agama UMNO Kelantan Datuk Dr Asyraf Wajdi Dusuki mentakrifkan prinsip wala' yang disebutkan dalam al-Quran dan Islam membawa maksud ketaatan yang bukan 'membuta tuli'.

"Kita mentaati pemimpin kerana institusi kepimpinan itu dan ketaatan kepada pemimpin itu selagi mana ia tidak menyuruh kita mensyirikkan dan melakukan kemaksiatan kepada Allah SWT, ini asas yang paling penting," katanya kepada Bernama di sini.

Asyraf Wajdi berkata tindakan menjatuhkan pemimpin yang berbuat kebaikan adalah tidak wajar, tambahan pula UMNO yang selama ini sentiasa menegakkan syiar Islam di negara ini sejak merdeka.

"Ikatan kita dengan Allah SWT, yang kita adalah pejuang kepada agamaNya dan kita mempertahankan pemimpin kerana pemimpin itu (perdana menteri) mewakili institusi (UMNO dan kerajaan) yang memperjuangkan agamaNya (Islam)," katanya.

Pemerhati dari UMNO Bahagian Tangga Batu, Melaka, Datuk Dr Aziz Ujang berkata negara akan hancur akibat perpecahan jika anggota parti gagal menunaikan tanggungjawab menzahirkan wala' dan kesetiaan kepada pemimpin dan negara.

"Di negara lain walaupun rakyatnya terdiri daripada satu atau dua bangsa, itu pun berlaku pertelagahan...apatah lagi di negara kita (yang berbilang kaum), dan ditambah pula pengaruh kuasa luar yang mempunyai agenda tersendiri," katanya.

Perwakilan UMNO Bahagian Pengerang, Johor, Roslan Ramli berkata ketaatan kepada pemimpin adalah penting bagi memastikan BN menang besar pada PRU14 akan datang seterusnya membentuk kerajaan.

Anggota Jawatankuasa Wanita UMNO Bahagian Tambun, Mardihah Mohd Yunus pula berkata penekanan soal wala' adalah sebagai ingatan kepada semua anggota supaya setia dan taat kepada kepimpinan dan tidak terbuai dengan hasutan pembangkang khususnya bekas pemimpin parti.

Pemerhati UMNO Bahagian Raub, Abdul Basits Mohamed Mokhtar pula berkata selain ketaatan dan kesetiaan bagi memastikan UMNO dan BN terus menerima mandat rakyat, anggota UMNO juga perlu memiliki mentaliti menang.

Sementara itu, penganalisis politik Prof Madya Mohd Izani Mohd Zain daripada Fakulti Ekologi Manusia Universiti Putra Malaysia (UPM) berpandangan penekanan Najib mengenai soal wala' adalah berikutan cabaran yang diterima parti itu ketika ini yang bukan sahaja daripada pembangkang, malah juga bekas pemimpin.

"Tanpa wala' kebersatuan ahli tidak akan dapat dicapai...pun begitu ketaatan ahli kepada pemimpin perlu dibayar dengan pemimpin juga perlu mendengar suara akar umbi dan denyutan nadi rakyat," katanya.

-- BERNAMA

Tag: [PAU2016](#), [umno2016](#), [Perhimpunan agung umno](#), [prinsip wala'](#), [kesetiaan](#)

© 2016 Astro Awani Network Sdn. Bhd. (535275-D) All Rights Reserved.

Source: <http://www.astroawani.com/berita-politik/prinsip-wala-dalam-umno-penting-untuk-kemenangan-bn-pada-pru14-124435>